

CYNGOR SIR CEREDIGION

Adroddiad i'r: Pwyllgor Ymddiriedolwyr Elusennau

Dyddiad y cyfarfod: 29 Mehefin 2023

Teitl: Diweddariad blynyddol Neuadd Goffa Ceinewydd 2022-2023

Diben yr adroddiad: Derbyn y diweddariad blynyddol

Er: Gwybodaeth

1. DIWEDDARIAD BLYNYDDOL

- 1.1 Fel y gŵyr yr Aelodau efallai, cafodd y Neuadd ei rhoi ar brydles gan y Cyngor, sef Ymddiriedolwr yr Elusen, i 'Neuadd Goffa Ceinewydd', sy'n Sefydliad Corfforedig Elusennol cofrestredig, a hynny am 99 mlynedd oddi ar 10 Chwefror 2020.
- 1.2 O dan gymal 26.6 o'r brydles mae'n rhaid i'r Sefydliad Corfforedig Elusennol roi crynodeb blynyddol i'r ymddiriedolwr ar y 10fed o Chwefror bob blwyddyn yn nodi'r defnydd a wnaed o'r eiddo yn ystod y 12 mis blaenorol. Pwrpas y rhwymedigaeth hon yw bod yr ymddiriedolwr yn gallu gweld bod y Neuadd yn cael ei defnyddio ar gyfer gweithgareddau cymunedol a dibenion eraill o fewn amcanion ymddiriedolaeth y Cyngor, sef ei '*defnyddio fel neuadd bentref i drigolion Ceinewydd a'r gymdogaeth heb wahaniaethu yn ôl barn wleidyddol, grefyddol neu farn arall, gan gynnwys ei defnyddio ar gyfer cyfarfodydd, darlithoedd a dosbarthiadau ac ar gyfer mathau eraill o hamdden a difyrrwch, gyda'r nod o wella amodau byw'r trigolion dywededig*'.
- 1.3 Yn dilyn cais gan Swyddogion, mae'r Sefydliad Corfforedig Elusennol bellach wedi rhoi'r wybodaeth ddiweddaraf ar gyfer 2022-2023 a gyflwynir yn Atodiad 1 er gwybodaeth.

Argymhelliad: Nodi'r diweddariad oddi wrth y tenant ar gyfer y cyfnod 10 Chwefror 2022 – 9 Chwefror 2023.

Y rhesymau dros y penderfyniad: I gydnabod bod y tenant yn cydymffurfio â chymal 26.6 o'r brydles dyddiedig 10 Chwefror 2020

Atodiadau: Atodiad 1 – Diweddariad gan Neuadd Goffa Ceinewydd

Pennaeth Gwasanaeth: y Elin Prysor – Swyddog Arweiniol Corfforaethol: Gwasanaethau Cyfreithiol a Llywodraethu

Swyddog Adrodd: Louise Harries – Cyfreithiwr

Dyddiad:

31/05/2023

ATODIAD 1 – DIWEDDARIAD GAN NEUADD GOFFA CEINEWYDD

Adroddiad Blynyddol ar gyfer Neuadd Goffa Ceinewydd Ionawr 2022 – Rhagfyr 2022,

Crynodeb o'r defnydd a wnaed o Neuadd Goffa Ceinewydd yn 2022.

Ffurfiwyd yr elusen ym mis Medi 2018 pan gafodd gweithgarwch, asedau a rhwymedigaethau elusen flaenorol y Neuadd Goffa eu trosglwyddo ac y rhoddwyd prydles newydd gan Gyngor Sir Ceredigion i bwyllgor newydd ad-drefnu a darparu gwasanaethau i'r trigolion lleol.

Caewyd y Neuadd Goffa ar gyfer gwaith adnewyddu llawn yn dilyn grant gan Lywodraeth Cymru ddechrau mis Ionawr 2020. Dilynwyd hyn gan Gyfnod Clo cenedlaethol Covid-19 ym mis Mawrth 2020, a ymestynnodd i ddechrau 2022.

Mae'r Neuadd bellach yn gwbl hygyrch i fyny'r grisiau i'r brif Neuadd ac i lawr y grisiau i'r clwb snwcer a'r ystafelloedd cyfarfod. Mae ramp mynediad a rheiliau diogelwch, manau parcio i bobl anabl, teledu cylch cyfyng, toiledau cwbl hygyrch a manau newid cewynnau i gyd bellach wedi'u rhoi yn eu lle er budd pob grŵp oedran. Mae drws tân newydd wedi ei osod i gael mynediad i risiau'r allanfa frys, mae Wi-fi ar gael drwy'r Neuadd, a chawsom grant gan raglen Cynnal y Cardi CSC ar gyfer sgrin Hybrid 72" i alluogi cyfarfodydd, hyfforddiant a digwyddiadau hybrid.

Erbyn 2022, roedd cyfarfodydd, digwyddiadau, a gweithgareddau chwaraeon wedi aildechrau'n raddol.

Agorwyd Llyfrgell newydd Ceinewydd, sydd bellach yn cael ei redeg gan wirfoddolwyr, yn Ystafell 4 yn y Neuadd ym mis Hydref 2021 gan gynnig gwasanaeth clicio a chasglu i ddechrau. Erbyn dechrau 2022, roedd wedi agor yn llawn.

Ailddechreuodd y Farchnad Gymunedol bob dydd Gwener ym mis Ebrill 2022, ac yn fuan roedd nifer o fyrddau wedi'u harchebu, gyda byrddau yn cynnig crefftiau lleol, bric a brac, cynnyrch, jamiau, wyau, cacennau a bwydydd sawrus, ynghyd â chaffi sy'n cael ei redeg gan wirfoddolwyr.

Mae Dyfodol Gwledig Cymru – Hafren Gwy a Cwmpas – Busnes Cymdeithasol Cymru wedi parhau i helpu a chynghori'r Ymddiriedolwyr drwy gydol 2022 ac maent ar hyn o bryd yn helpu'r Ymddiriedolwyr i wneud cais am arian y Loteri Genedlaethol ar gyfer Cydlynedd Hwb llawn amser i gefnogi gwaith yr Ymddiriedolwyr a'r Gwirfoddolwyr. Mae pob Ymddiriedolwr bellach wedi mynychu sesiynau hyfforddi i Ymddiriedolwyr.

Ym mis Awst 2022, cyflwynwyd prosiect derbyn dillad a gwisg ysgol ail-law, sef ‘*The Clothes Rail Project*’. Roedd yr ymateb yn yr ardal leol yn wych. Mae hyn wedi arbed nifer fawr o ddillad rhag cael eu hanfon i safle tirlenwi ac wedi diwallu angen amlwg am ddillad rhad. Roedd hyn yn arbennig o lwyddiannus yn ystod y tywydd oer gwaethaf ers blynyddoedd lawer ym mis Tachwedd / Rhagfyr 2022, roeddem yn gallu darparu dillad gaeaf am ddim i unrhyw un oedd eu hangen.

Ym mis Hydref 2022 ar ddechrau'r ‘Argyfwng Costau Byw’, roedd angen am ‘Fan Cynnes’. Gyda chymorth grant gan CAVO roeddem yn gallu darparu amgylchedd cyfeillgar a chynnes a oedd yn cael ei redeg yn wythnosol gan wirfoddolwyr gan gynnig amrywiaeth o weithgareddau crefft, Wi-fi, diodydd poeth a byrbrydau. O ganlyniad i'n digwyddiadau codi arian a'r ffaith fod y neuadd yn cael ei defnyddio fwy ar gyfer chwaraeon, roedd angen cyfleusterau storio ychwanegol ac rydym bellach wedi prynu uned storio i gadw'r rhoddion a'r offer ychwanegol.

Roedd y digwyddiadau a'r gweithgareddau wythnosol a misol yn y Neuadd yn 2022 yn cynnwys caffi a marchnad wythnosol, gwasanaethau cymorth i deuluoedd, loga, Clonc – sgwrs Gymraeg, Salsa, tennis bwrdd, badminton, Qingong, ac amrywiaeth o grwpiau crefftau a lles. Hefyd *Seaside Sisters* Sefydliad y Merched, Clwb Camera, Côr Cei, Clwb Snwcer a'r Lleng Brydeinig.

Mae defnyddwyr ychwanegol y Neuadd yn cynnwys y Cyngor Tref, Gwasanaethau Etholiadol y Cyngor, Gwasanaethau Trallwys Gwaed, Clwb Hwyllo Ceinewydd, Sefydliad Cenedlaethol Brenhinol y Badau Achub (RNLI), Ysgol Gynradd Ceinewydd, Cybiau ac Afancod Cymdeithas y Sgowtiaid, ac yn bwysig iawn, y grŵp codi arian lleol, ‘*Working 4 New Quay – W4NQ*’, sydd wedi trefnu amrywiaeth o ddigwyddiadau yn y Neuadd ar gyfer pob grŵp oedran trwy gydol y flwyddyn.

Mae cynlluniau ar gyfer y dyfodol yn cynnwys Cydlynnydd Hwb llawn amser am 3 blynedd – yn amodol ar gais llwyddiannus am arian gan y Loteri, clwb newydd i bobl ifanc mewn partneriaeth â Chanolfan yr Urdd, grŵp bowllo dan do, gwasanaeth benthyg offer a theganau babanod, grŵp mam a phlant bach, Clwb Cinio a bws mini cymunedol mewn partneriaeth â Dolen Teifi.

Mae'r Neuadd hefyd yn parhau i gael ei defnyddio ar gyfer digwyddiadau hyfforddi, cyfarfodydd, arddangosfeydd, digwyddiadau cerddoriaeth, partïon teulu a dathliadau.

Mae gwirfoddolwyr yn parhau i fod yn hanfodol i redeg y Neuadd a'r Llyfrgell, fodd bynnag, mae'r holl wirfoddolwyr gwych yn bobl brysur a byddem wrth ein bodd yn cael mwy o gymorth, rhowch wybod i ni os ydych yn gallu sbario ychydig oriau yn achlysurol i helpu.

Hoffem ddiolch i'n gwirfoddolwyr a'n cefnogwyr, CAVO, Grŵp Dyfodol Gwledig Hafren Gwy, *Working 4 New Quay*, *The Seahorse*, a phawb sydd wedi cyfrannu at ein digwyddiadau codi arian.